

Suspek wanita hina Islam direman

Tiada kompromi isu babitkan sensitiviti agama, DBKL gantung sementara operasi kelab komedi

Oleh Safeek Affendy Razali,
Zaidi Mohamad dan
Mohd Nasaruddin Parzi
bhnews@bh.com.my

Kuala Lumpur: Suspek wanita yang disyaki menghina Islam ketika membuat persembahan di sebuah kelab komedi di Taman Tun Dr Ismail (TTDI), di sini, ditahan, malam kelmarin.

Suspek ditahan oleh sepasukan pegawai dan anggota Unit Siasatan Jenayah Terkelas (USJT), Bukit Aman, di Jalan Gasing, Petaling Jaya.

Setiausaha Polis Malaysia, Polis Diraja Malaysia, Datuk Noor-siah Saaduddin, berkata suspek wanita berumur 26 tahun itu di-reman semalam.

“Suspek akan direman selama tiga hari bermula hari ini (se-malam) sehingga Selasa.

“Pada masa ini suspek ditempatkan di Ibu Pejabat Polis Daerah (IPD) Brickfields, bagi membolehkan siasatan lanjut diteruskan,” katanya kepada *BH*, semalam.

Terdahulu, tular satu video memaparkan wanita yang berasal dari Kuala Kangsar, Perak, itu membuat persembahan di sebuah kelab komedi sambil menghina agama Islam.

Wanita itu dalam persembahannya menyatakan sesuatu mengenai dirinya sambil memakai baju kurung dan bertudung sebelum menanggalkan tudung dan baju kurung dipakainya.

Pada masa ini, USJT menjalankan siasatan mengikut Seksyen 298A Kanun Keseksaan dan Seksyen 233 Akta Komunikasi dan Multimedia 1998.

Sementara itu, pelawak terkenal, Harith Iskander, berkata tindakan wanita itu mempersenda agama Islam dengan menanggalkan pakaian dan tudung ketika membuat persembahan, sangat tidak patut.

Malah, tegasnya, apa yang dipersembahkan bukan persembahan komedi berdiri.

Beliau yang pernah dinobatkan sebagai Manusia Paling Lucu Di Dunia menerusi pertandingan *The Funniest Person In The World* (TFPW) di Levi, Finland pada 2016, berkata dia menyuarakan pandangan atas paksi dirinya berada dalam komuniti komedi tanah air.

“Wanita ini bukannya pelawak. Apa yang dipersembahkan juga bukan persembahan komedi berdiri. Betul, ia dipersembahkan di sebuah kelab komedi yang terbuka.

“Dia boleh sahaja ke restoran dan mendakwa dirinya sebagai cef. Kemudian, memuat naik video masakan sambil memuji dirinya pandai memasak,” katanya menerusi rakaman video di Instagram.

Harith berkata, situasi sama juga dengan tindakan wanita itu di kelab komedi berkenaan.

Beliau yang sudah 32 tahun melakukan persembahan komedi berdiri secara profesional, berkata perlu ada kebijaksanaan dalam menampilkan lawak jenaka yang bijak.

“Benar, ketawa penawar duka. Bagaimanapun, saya tengok wanita ini sangat menyakitkan dan tak lawak langsung apa dipersembahkan,” katanya.

Ini satu mesej jelas, Kementerian Wilayah Persekutuan (KWP) dan DBKL tidak akan sama sekali bertoleransi dengan apa juga aktiviti yang melanggar mana-mana sensitiviti membabitkan agama, bangsa dan kedaulatan negara



Jalaluddin Alias,
Timbalan Menteri Wilayah Persekutuan

Dalam pada itu, Dewan Bandaraya Kuala Lumpur (DBKL) menggantung sementara secara serta-merta lesen kelab komedi di TTDI, di sini susulan satu klip video tular dipercayai menghina agama Islam.

Timbalan Menteri Wilayah Persekutuan, Datuk Seri Jalaluddin Alias, berkata DBKL tidak akan berkompromi dalam isu sebegini, terutama membabitkan sensitiviti agama.

“DBKL sudah membuat siasatan lanjut terhadap lesen premis berkenaan dan tindakan menggantung sementara pengoperasian premis berkenaan sudah di-

lakukan secara serta-merta.

“Ini satu mesej jelas, Kementerian Wilayah Persekutuan (KWP) dan DBKL tidak akan sama sekali bertoleransi dengan apa juga aktiviti yang melanggar mana-mana sensitiviti membabitkan agama, bangsa dan kedaulatan negara,” katanya dalam satu kenyataan, kelmarin.

Katanya, isu ini mendapat kecaman daripada penduduk berhampiran dan netizen di media sosial yang berpendapat, video tular berkenaan jelas dan terang satu perbuatan bertujuan menghina serta mencemarkan imej agama Islam.